

课士新艺

一
玉
七
册
玉



萍鄉課士新藝卷四目錄

八月十八日龍洲栗江二書院課題全載

內政

問古者祀典掌於秩宗周禮春官之職釐然不紊春秋以降
漸有淫祀然正人讜論猶足以勝之秦漢之際方士說興
史遷封禪一書雜糅殊甚厥後金人入漢明之夢景教傳
唐代之碑寺刹宮觀徧於天下今欲釐正祀典其道奚由
試抒所見陳之

選三

問三代以下貞觀最稱盛治讀史者猶謂不逮先王然歷宋
至明治化更不及唐試詳稽貞觀之政有可施於今日者

歟

選三

宣上德抒下情論 選三

外交

問中西刑律不同西人每譏中國刑法太重故寓華西人不
受管轄然中國刑罰世輕世重至我

朝實爲最輕乾隆以後尤從寬典何以西人猶以爲重日本改
從西法流弊已生豈亞洲之人果遜於歐洲歟試綜其異
同探其本原論之 選三

中西醫學平議 選一 附錄一

張騫始通西域論 選六

理財

問山林之富不讓川澤江右古稱豫章本爲產木之區前代

山深林密自然之利取之不禁今墾闢已久材木漸稀則
十年樹木計不容緩試就土宜所在籌議及之 選一

問天下大利歸農必如何始盡其利歟 選三

利用厚生先以正德論 選四

經武

問咸豐同治以來勦賊二十餘年未收綠營之效亦未收武
科之效論者咸歸咎於從前立法未善近議變法合營伍
武科爲一途洵爲至當不易顧

國初何以未見及此能推原其故歟 選二

明以前兵書惟戚氏所著切實可用論 選三

書魏默深議武五篇後 選三

格物門算學

設如同股不同式兩句股形只知其股二百八十尺兩句相和二百七十三尺兩弦相較六十三尺試分求各句各弦幾何

今有礦內存煤發運至廠計用船載七分之三又用車推八分之二又用夫挑九分之一共到廠煤二十八萬六千五百六十斤尙未運完問原煤總數及礦內餘存并船車夫三項分運各若干

假如截竹爲筒上下粗細如一口徑三寸筒深一尺二寸問貯油斤兩幾何 均另選

考工

問古者司空平治水土九月除道十月成梁單子以此覩國
之興衰秦西於修治道路不遺餘力近日上海興築馬路
金陵武昌陸續推行能攷其工費及規制辦法歟 未選
來百王則財用足論 擬作二

氣球形製用法攷 擬作二

以上共擬作四首選三十五首附錄一首 萍邑城北安樂
鄉有鎮曰上栗市設巡檢司治焉其地距城九十里士子不
便考課光緒十七年余勸諭是鄉紳富創建書院名曰栗江
會解組去未竟其事茲復申前議甫告成功七月開課因六
門策論題目煩多故與鰲洲書院同題八月復課試一次茲
所選刻但以題目相從不復區別云勵堂識

右所選九十三首益以余擬作九首附錄兒輩所作十首凡百十二篇都爲四卷余自閏三月至八月課士所甄錄也閏月初課準特科以行六七八月則卽書院常課改試策論者會以事變盡復舊制九月以後遂仍循曩昔課程秋成旣畢歲晚務閒士子於藏修之餘與田夫野老憩息優游其安不識不知之素以視前日馳情域外較量五大洲之興衰蒿目時艱圖度四百兆之生聚者其勞逸蓋迥不侔矣守土末吏職在奉行惟 功令之是從詎繩尺之敢越顧念數日來諸生剴切孟晉之精心與鄙人策勵振拔之苦志胥於是乎在爰於停止報館後專印是編以竟其緒鏤冰刻脂虛費日力特欲使與是選者各度一冊畱作雪泥鴻爪之證以爲固嘗致力於此云爾尋奉 制府劉公檄行各郡謂士子應崇

尚實學未可專就制藝用功書院宜兼課經史掌故時務不得僅以制藝試帖敷衍塞責出色學生許隨時舉報偉哉亮哉 三朝耆舊 中興名臣其識見卓越大公無私洵非尋常意計所及哉節序循環瞬將改歲一弛一張文武之義遂擬更定書院課程仿古人剛日讀經柔日讀史之例來歲以四書文及經史時務相間命題以仰副 制府訓飭之意而是編亦遂得不廢因促匠速藏厥事以示同志明知嬰兒學語初識之無不足當大雅之一睇第以一隅之地僻處腹內與江海大埤埤見洽聞者異迺感於天子求治之銳奮迅淬厲曾未半載已臻斯詣亦足以見我朝德澤之深而中國人才之大可有爲於當世也已長至後七日顧家相勸堂氏謹跋

男迪光燮光適光校字

萍鄉課士新藝卷之四

問古者祀典掌於秩宗周禮春官之職釐然不紊春秋以降漸有淫祀然正人讜論猶足以勝之秦漢之際方士說興史遷封禪一書雜糅殊甚厥後金人入漢明之夢景教傳唐代之碑寺刹宮觀徧於天下今欲釐正祀典其道奚由試抒所見陳之

王守文

在易之觀神道設教五之履顯以中正而觀天下以中正觀天下故下觀而化然而上且觀其可樂之生而有軼軼之志是以觀盟而不觀薦孔子曰聖人患禮之不達於下也故祭帝於郊使下觀而化也觀化之道莫尚於祭久矣故積誠以格無器而人自趨不言而信自喻有視爵賞刑政而更深入人心者矣自唐虞以來秩

宗掌其祀典春官專其職司土既重之下則化之皆秩然不亂而後世一切不正之祀未之前聞焉或曰淫祀之漸開自春秋然齊桓之謀封禪以管仲言而止季氏之旅泰山得孔子言而正楚昭不崇河周史論有莘子產不信裨竈晏子能諫禳彗凡此皆皇皇正論彼邪說自不攻而悉戢乃秦漢以降文成五利安期輩之說興而史遷乃託封禪以微示其意終曰無有驗無有效其心如揭也試觀五帝本紀黃帝書葬橋山而其餘概未之書亦曰黃帝固人也有冢可據彼方士者胡爲猶託此以惑世也厥後漢明帝夢一丈金人遣蔡愔等二十八人抵天竺得佛經四十二章遂建寺塑像貽中國千百年無窮之害然西方祇教其流六七其源則一景教者亦曰波斯教亦曰太陽火教至唐貞觀大秦僧阿羅本將

經像來獻詔立大秦寺度僧二十一人越代宗建中二年大秦寺
僧景淨述其緣起撰流行碑其言氣水火土四行則取佛書其言
判十字以定四方則從天方教然則景教者固參釋氏以合巫家
由回教以入天主者也以中國聲明文物之邦而又經春秋賢君
相正言讜論糾謬於前胡穎韓文公輩極諫直陳駁正於後何寺
刹宮觀交墊中州代積而愈甚也豈正學不足以敵邪說常經不
足以勝異言歟或曰毀其宮觀或曰改爲聖賢廟堂或曰取產業
充公一旦詔令十年二十年後將渺不知法座爲何物或曰寺觀
等處仍塑聖賢像聽婦孺往來祈禱以投其禍福之心似亦不悖
神道設教之旨然寺刹爲佛老之居聖賢終吐其饗祀產業充公
使僧尼爲餓夫乎爲亡命乎婦孺往來恐寺內侍奉香火終多姦

徒甚至遊手無賴勾通引誘煽惑良民則根猶未拔也且近如耶蘇等教中國前古未有也而西人乃藉口傳教建立教堂則十字架之漸其卽佛入中國之初歟吾思之吾重思之私造菴院私度僧道戶律有禁依律則有復敢離父母妻兒出身爲僧者殺無赦推廣其意其已然者畜髮爲民而一切寺刹以誦詩讀書子弟住之名曰鄉塾產業公捐者充公僧置之產歸出寺爲民者瓜分之以養其身行見家喻戶曉人人知有君臣父子夫婦之樂而一切惑世誣民之說不接於耳目并心一志耕田而食鑿井而飲不知有他沕沕噩噩盛世之民庶有合於孟子經正民興之旨如曰焚其書毀其像則層污疊垢不勝焚毀卽焚毀亦得半之道也抑又聞之求福反蒙其禍求榮反至於辱昔者穆王失矣秦皇繼之漢

武唐明又繼之是誠何心哉夸與貪而已矣貪生於所無而夸出於不足皆欲也位祿名壽人之大欲貴爲天子富有四海則既有其位又有其祿矣其不足者名而所無者壽耳於是征四夷勤遠畧將以夸名而不知治愈卑禮方士求神仙將以貪生而不知身愈乏其固謂致人所能致猶未足必致人所不能致然後無憾也抑知道在邇而求諸遠事在易而求諸難惟精惟一敬以作所卽白晝飛昇法也自唐虞三代以來聖君哲相祈天永命皆於是而乃鰓鰓外馳以求之是之燕而南其轅兩駢風駛自謂卽至而不知其身益遠燕也旨哉周隱遙之告隋文曰帝王脩道速於人臣一言之善萬域蒙福臣之所學非萬乘所脩劉知古亦謂明皇人主長生與庶人異欲得長生當先道化人和氣洽則仙自致矣二

子之言可謂知本哉是故始皇愎惑不悟卒至淩遲沙邱身首不
歟爲天下笑倘當年穆王遺祭公之諫將不獲沒於祗宮明皇稽
至德之禮將不得崩於南內武帝苟非狼狽自悔易危爲安將龍
淵之廟不立矣數君皆英主顧其初皆爲方士所惑何也亦自縱
其欲而授方士以可惑之端也彼夫庸耳俗目禱祈木偶禮拜泥
塑問卜求醫慎乎若狂毋亦趨吉避凶轉禍爲福之心勝而理義
之先自亡也邪今欲正淫祀之非當先牖其所本明而防其所未
發孔子生周末毅然以斯文爲己任孟子當戰國皇然閑先聖之
道卒也正學明異端黜天下後世皆曉然於中正以觀天下之意
然則斯道終不以淫辭邪說而遂蕩然無存者則亦吾黨一二儒
者之功也可不瞿然興哉

敷陳典贍策畫周詳

前題

歐陽丙照

國之大事在祀與戎我朝近圖變法自強海軍陸軍加意整飭各省並設武備學堂演陣教戰苟能實事求是戎備可謂盛矣惟祀典之宜釐正亦不容緩雖奉明諭改寺觀爲學堂而詳細

節目未及頒示有司奉行罔所依據承數千年來寺刹宮觀徧於天下之後而欲議釐正誠世道人心之急務而要不容率爾以從事也竊以爲釐正之道仍不外以春官之釐然不素者變通之而已夫所謂釐然不素者禮也天之經地之義民之行也至尊莫大乎天地至親莫大於祖宗教天下莫大乎聖賢養天下莫大乎土穀周禮春官之職掌祀天神地祇人鬼三者以類相從凡日月星

辰司中司命風師雨師之類列於天神社稷五祀五嶽山林川澤
四方百物之類列於地祇三社七廟先王先公及歷代聖君賢臣
有功民物者列於人鬼故記有之曰法施於民則祀之以死勤事
則祀之以勞定國則祀之能禦大菑則祀之能捍大患則祀之非
此族也不在祀典本朝長洲沈氏亦有言曰郊祀天報生物功也
社祀地報成物功也立廟以祀先王報創業垂統功也建學以祀
先聖報參贊天地萬世永賴功也此古者天子大報禮萬世不易
之祀典也自後世方士說興道佛繼起漢不能革秦時諸時渭陽
五帝之廟甘泉泰一之壇皆親往祠郊社大典不掌於祠官而領
於方士而祀天地之禮素晉隋而下尊崇二氏與儒敎等至有毀
宗廟祭祀薄先聖典禮以奉之者而祀人鬼之禮尤素魏延昌時

淫祠一萬三千餘區東魏正光後三萬餘區唐武后時江南一隅
亦有千七百餘區宋徽宗明世宗好道之尤者也梁武捨身爲佛
家奴元祖毀宋故宮爲佛寺事佛之甚者也淫祀宮觀俱有加靡
已而唐代景教一碑遂爲泰西祇教東來所託始其流極在千餘
年之後而濫觴已在千餘年以前矣我朝聖道昌明置二氏於
若有若無之列而天下梵刹亦不下數千百所夫斥於漢罷於東
魏禁於齊燬書於元而道不絕祀誅於魏汰於唐禁於宋燒除於
明而佛不絕祀最善者周武帝並廢二氏悉毀經像沙門道士俱
還俗立通道觀以一聖教而佛道亦不絕祀甚至咸豐年間粵賊
洪秀全等竊泰西諸國緒餘燔燒諸廟羣祀在典與不在典一切
毀棄獨有事於其所謂天者道士及浮屠弟子並見摧滅其事雖